

समां - 12:25 hrs.

<><><><><><><><>

### ST Scholarships

जनजातीय मामलें आले मैहकमे नै पट्टीदर्ज जनजाति दे योग्य विद्यार्थियें गी मेट्रिक दे बाद आले वजीफे दी इलैक्ट्रानिक ढंग्गै कन्नै बंड शुरु करी दिती ऐ- जेहदे नै ज्हारां बद्दे लाभार्थियें गी बड़ी बड़्डी राहत हासल होआ करदी ऐ। ध्यानजोग ऐ जे इक्कली नोडल एजेंसी यानि एस.एन.ए प्रणाली थमां “एस.एन.ए स्पर्श” मंच पर मुंतकिल होने दे दरान पेश आए दे किश तकनीकी मसलें करी इनें अदायगियें च चिर लग्गी गया हा। राश्ट्री सूचना विज्ञान केन्द्र नै हुन इस समस्या गी हल करी लैता ऐ ते एहदे कन्नै हुन नमीं बवस्था तैहत भुगतान करने आला जम्मू-कश्मीर पैहला केन्द्र शासत प्रदेश बनी गया ऐ। 16 करोड़ 65 लक्ख रुपें दी रकम सिद्धे लाह मुंतकिल करने आली बवस्था दे राहें जारी कीती जा रदी ऐ। जनजाती मामलें दे मंत्री जावेद अहमद राणा होरें आखेया जे सब्बै योग्य विद्यार्थियें गी तौले गै वजीफें हासल होगन।

<><><><><><><><>

### Poonch- Property Attached

बन्ने पारा आतंकवाद ते ओहदे समर्थन आहले नैटवर्क पर इक बड़्डी कारवाई करदे होई जम्मू-कश्मीर पुलिस नै गैर-कनूनी गतिविधियें दी रोकथमाम सरबन्धी कनून यू.ए.पी.ए दे सख्त प्रावधानें तैहत पुंछ जिले च पाकिस्तान स्थित इक आतंकी हैंडलर ते लांच कमांडर

दी अचल सम्पत्ति जब्त कीती ऐ। जब्त कीती गेदी एह सम्पत्ति मुकामी बसनीक रफीक नाई उर्फ सुलतान वल्द मोहम्मद अफसर दी मालकी आहली ऐ। रफीक इसलै पाकिस्तान स्थित हैंडलर ते प्रतिबंधित आतंकवादी संगठन तहरीक-उल-मुजाहिद्दीन- जम्मू-कश्मीर गज़नवी फोर्स दे लांच कमांडर दे तौरा पर भैंडे कम्म करा रदा ऐ।

<><><><><><>

### **Terror Associates Arrested**

जम्मू-कश्मीर पुलसै कल मध्य-कश्मीर दे गांदरबल जिले च चिरें संजा चलाए गेदे इक अभियान दे दरान आतंकवादियें दे दंऊ मददगारें गी गिरफ्तार करियें असलाह-बरुद ते कन्नै 8 लक्ख 40 ज्हार रपें दी नगदी बरामद कीती। बरामद कीते गेदे समेयान च इक चीनी पिस्तौल- इक मैगज़ीन- पस्तौल दे गै 4 राउंद- 2 हत्थगोले ते 8 लक्ख 40 ज्हार 500 रपें नकद शामिल न। गैर-कनूनी गतिविधियें दी रोकथाम आले कानून ते थेहारें सरबन्धी कनून दियें बक्ख-बक्ख दफाएं तैहत गांदरबल आले पुलस थाने च मामला दर्ज करियें अगड़ी तफ्तीश रम्भ करी दिती गई ऐ।

<><><><><><>

### **DGP Religious Sites**

जम्मू-कश्मीर पुलसा दे ड़ैक्टर जनरल नलिन प्रभात होरें आई.जी.पी. जम्मू ते सी.आर.पी.एफ जम्मू सैक्टर दे आई.जी.पी. हुंदे नै जम्मू च महत्वे आहलियें धार्मिक थाहरें दी सुरक्षा बवस्था दा जायजा लैता ऐ। इस दरान मते घेरें आले सुरक्षा बंदोबस्ते गी तगड़ा

बनाने- भीड़ दे असरदार ढंगे कन्नै प्रबंधन ते तकनीकें दे उचित ढंगे सिर इस्तेमाल बारे मुख करी ध्यान केन्द्रित कीता गया। एहदे इलावा इस दरान पुलस- सी.आर.पी.एफ ते होरने सुरक्षा एजेंसियें बशकार नेड़में तालमेल दी जरूरतें पर बी चेचा जोर पाया गया। डी.जी.पी. होरें सरबंधत अधिकारियें गी एह निर्देश दिता जे ओह रमामदारी बरकरार रक्खने ते धार्मिक थाहरें पर जाने आले श्रद्धालुएं दी सुरक्षा जकीनी बनाने लेई सख्त हीलें गी अमल च आहनन।



**National Roll Ball**

17मीं जूनियर रोलबॉल राष्ट्रीय प्रतियोगिता जंदे रोज जम्मू दे एम.ए. स्टेडियम च कामयाबी कन्नै सम्पन्न होई। इस प्रतियोगिता च 26 राज्यें ते केन्द्र शासित प्रदेशें दे तकरीबन 600 खडारियें ते अधिकारियें हिस्सा लेइयें रफ्तार- हुनर ते खेड भावना दा प्रदर्शन कीता। फाईनल च असम नै अपने खताब दा बचाव करदे होई इक बारी परतियें कुडियें दा खताब जितेया- जिसलै के राजस्थान नै लगातार 5मां जागर्तें दा खताब अपने नांस करदे होई अपनी जित दा सिलसिला जारी रखेया। आयोजकें आखेया ऐ जे इस चैम्पियनशीप नै नौजवानें च रोल बॉल गी बढ़ावा दिता ऐ ते बड्डे आयोजनें दे केन्द्र दे तौरा पर भी जम्मू दी बदधी प्रतिष्ठा गी होर बधाया ऐ।



## Building New India

ब'रा 2025 भारत दे बुनियादी ढांचे दे विकास च इक मील दा पत्थर रेहा ऐ जेहड़ा रेल, शिड़क ते रणनीतिक संपर्क च बड़्डी उपलब्धिएं गी दर्शांदा ऐ। उधमपुर-श्रीनगर-बारामुला रेल लिंक परियोजना दे हिस्से दे तोरा पर दुनिया दे सभनें शा उच्चे रेलवे पुल, चिनाब पुल दा उद्घाटन इक इयै नेई गै मिसाल ऐ। इस पुल दे निर्माण कन्नै कश्मीर घाटी च हर रूतै च रेल पुज्ज उपलब्ध होआ करदी ऐ। प्रधानमंत्री होरें जम्मू-कश्मीर च सामरिक महत्वै आहली जेड मोड सुरंग दा बी 2025 ब'रे च गै उद्घाटन कीता हा जेहदे कन्नै सोनमर्ग तगर ब'रे भर पुज्ज यकीनी बनी सकी ऐ। एहदे कन्नै सैलसफा गी बढ़ावा थहोग, एमरजेंसी सेवाएं गी बधाया जाई सकोग ते लद्दाख खिते लेई रक्षा रसद गी होर तगड़ा बनाया जाई सकोग।



## JKBOSE Syllabus

जम्मू-कश्मीर स्कूल शिक्षा बोर्ड नै दसमी- 11मीं ते बारहमीं जमात दे विद्यार्थियों दे फेल रीपियर ते नमें सिरेया प्राइवेट म्तेहान देने आहले लेई पुराने सिलेबस गी अधिकारिक तौरा पर खत्म करी दिता ऐ। बोर्ड नै आखेया ऐ जे विद्यार्थियों गी पैहले गै पिच्छले नियमें तैहत केंई मौके दिते गेदे हे ते हून एह स्कीम पुरानी होई चुकी दी ऐ। बोर्ड आसेया जारी इक अधिसूचना मुजब- पराने सिलेबस दे तैहत हुन अगगे कोई म्तेहान नेंई लैता जाग। मेदवारें गी सलाह दिती गई ऐ जे ओह 2026 ते एहदे मगरा होने आहले सलाना प्राइवेट जां बरे च दो बारी होने आहले म्तेहानें लेई नमें सिलेबस मताबक तयारी करन।

<><><><><><>